

**Lawatan 2 hari Agong ke P Pinang**  
**Malaysiakini.com**  
**June 24, 2011**

Yang di-Pertuan Agong Tuanku Mizan Zainal Abidin dan Raja Permaisuri Agong Tuanku Nur Zahirah tiba di George Town untuk lawatan rasmi dua hari ke Pulau Pinang mulai hari ini.

Keberangkatan tiba Seri Paduka berdua di Lapangan Terbang Antarabangsa Pulau Pinang pada pukul 11.20 pagi disambut Yang Dipertua Negeri Tun Abdul Rahman Abbas dan isteri Toh Puan Majimor Sharif.

Ketua Menteri Lim Guan Eng bersama isteri, Betty Chew Gek Cheng serta Pengerusi Badan Perhubungan Umno Negeri Datuk Seri Zainal Abidin Osman antara yang turut hadir menyambut ketibaan Yang di-Pertuan Agong dan Raja Permaisuri Agong.

Tuanku Mizan dijadual menunaikan solat Jumaat di Masjid Negeri di sini sebelum berangkat bersama Tuanku Nur Zahirah untuk merasmikan sekolah agama Maahad Al Mashoor Al-Islami di Balik Pulau.

Pada sebelah malamnya, Seri Paduka berdua akan diraikan pada majlis Santapan Menjunjung Kasih Kerajaan Negeri di Hotel Equatorial di Bukit Jambul.

Esok, Tuanku Mizan dijadual merasmikan Al-Khamsa Endurance Club di Taman Perbandaran Pulau Pinang sebelum menyertai Tuanku Nur Zahirah melawat Bukit Bendera.

Yang di-Pertuan Agong dan Raja Permaisuri Agong dijadual berangkat menghadiri majlis santapan tengah hari di kediaman rasmi Yang Dipertua Negeri di Seri Mutiara sebelum berangkat ke Terengganu pada sebelah petang.

--Bernama